



## RWAN – tyfu reis

Mae bywyd ffermwyr y Pilipinas yn cael ei effeithio gan newid hinsawdd heddiw. Mae corwyntoedd yn fwy aml, y gwyntoedd yn gryfach, y glaw yn drymach a phatrwm y tywydd yn gyffredinol yn fwy anrhagweladwy. Gwna hyn ffermio yn anodd iawn. A chyda 30% o bobl y Pilipinas yn ddibynnol ar ffermio am eu bywoliaeth, mae'n holl bwysig eu bod yn darganfod ffyrdd o addasu er mwyn gallu dygymod.

Yn rhanbarth Sorsogon, mae RWAN (Rice Watch and Action Network), un o bartneriaid Cymorth Cristnogol, yn hyfforddi ffermwyr a'u helpu i addasu i'r sefyllfa sy'n newid. Maent yn dod a ffermwyr, arbenigwyr tywydd a chynghorau lleol at ei gilydd mewn ymdrech i geisio gwella cynydu.

### Arbrofi gyda mathau o reis gwahanol

Mae Naomi Bantwan yn fam i bedwar o fechgyn ac yn byw yn Irosin, tref yn rhanbarth Sorsogon. Mae'n rhan o arbrawf yn ei chymuned, sef tyfu reis sydd yn wydn yn wyneb effeithiau newid hinsawdd.

Mae Naomi a'i chydweithwyr yn cerdded siwrne o awr pob dydd Gwener i safle'r arbrawf. Yno maent yn treulio'r prynhawn yn mesur twf eu planhigion - yn cyfrif pob deilen a mesur maint y coesyntau. Maent hefyd yn gwirio pa bryfetach sydd ar y planhigion a byddant yn arbrofi gyda gwahanol fathau o blaladdwyr organig a naturiol. Mae'n waith manwl a blinedig, ond, fel y dengys arbrofion o'r gorffennol, mae'n waith sy'n dwyn ffrwyth mewn cynydu gwell.

Mae Ysgolion Maes Dycnwch Hinsawdd, sydd yn rheoli'r arbrawf uchod, yn rhan o waith allweddol RWAN. Mae'r ysgolion hyn, sy'n cael eu cynnal mewn gwahanol gymunedau, yn hyfforddi'r ffermwyr mewn technegau ffermio sydd yn well ar gyfer y patrymau tywydd newydd. Mewn rhaglen 16 wythnos, dysga'r ffermwyr sut i blannu gwanhaol fathau o blanhigion reis ac astudio eu



Anna Jane o Gymorth Cristnogol a Cheryl a Bethan, EBC, yn cyfarfod Naomi yn ei chae reis.

twf i weld pa un sydd orau ar gyfer eu hardal hwy. Mae RWAN yn monitro'r tywydd yn ofalus hefyd, ac yn anfon negeseuon testun i'r ffermwyr gyda rhagolygon y tywydd. Mae hyn yn caniatáu'r ffermwyr i blannu a medi ar yr adeg gorau.

Yn ogystal ag anfon rhagolygon y tywydd i ffonau'r ffermwyr, mae RWAN yn gosod diweddariad tywydd ar hysbysfwrdd y tu allan i'w swyddfeydd. Yn y gorffennol byddai corwyntoedd yn gallu dinistrio cynydu cyfan oherwydd iddynt gyrraedd yn ddirybudd. Ond bellach mae'r rhybuddion hyn yn help i'r ffermwyr baratoi ar eu cyfer.

### Costau is yn fuddiol

Gwelir effaith gwaith RWAN gyda ffermwyr, arbenigwyr hinsawdd a swyddogion lleol yn y costau is ar gyfer ffermio. Ynghynt gallai ffermwr ddefnyddio 100kg o had i gynhyrchu cnwd ond bellach gellid gwneud hynny gyda dim ond 40kg - sydd yn golygu llawer llai o gost.

Mae'r costau is hyn wedi arwain at fuddiannau eraill. Er enghraifft, mae ffermwyr Barangay Tongdol wedi adeiladu siop gig ar gyfer eu cymuned. Buddsoddodd pob aelod 500 peso (£8.20) ac maent yn awr yn gwerthu cig i'r gymuned letach. Maent hefyd yn gallu gwerthu i aelodau'r grŵp am bris is.

Golyga hyn bod ganddynt obaith i'w plant. Diolch i'r incwm ychwanegol hwn gall y plant dderbyn addysg ac mae gobaith gwirioneddol y gallant reoli'r rhaglen eu hunain rhyw ddydd. Mae eu dyfodol yn llawer mwy diogel bellach ac ni fyddai hyn wedi bod yn bosibl heb help RWAN.



## Gweddi

Arglwydd Dduw, diolch iti am fyd mor hyfryd. Mae'n ddrwg gennym ein bod wedi amharu cymaint arno. Gweddiwn dros gymunedau y Pilipinas sy'n dioddef effaith newid hinsawdd. Diolchwn am waith partner Cymorth Cristnogol, RWAN, a'u gwaith gyda ffremwyr yn cynhyrchu cnydau reis mwy gwydn. Parha i fendithio eu hymdrechion. Gofynwn yn neilltuol dros ffermwyr bach fel Naomi, y byddant yn gweld ffrwyth i'w gwaith. Yn enw Iesu. Amen.